

9. oktober 2019

UKA 2019/55

Kalaallit Nunaanni politimesteri nunap ilaani aalajangersimasuni immikkut akuersissuteqarsinnaanera periarfissaqartillugu nunami maani inunnik angallassissutini biilini assakaasut quaannaveeqqutillit atoqqusaajunnaarnissaat siunertaralugu naalagaaffeqatigiinni oqartussaaffinnut saaffigineqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Steen Lynge, Demokraatit)

Siullermik aalajangiiffigisassatut siunnersuummut massumanga suliaqartumut Steen Lynge Demokraatineersumut qujavugut, siunnersuut ilisimasani nunanit allaneersunit annertuumik paasisaqarfigineqarsimasunit tunngaveqarluni suliarillugaasut taaneqarsinnaasoq.

Siumumi tunngaviusumik isumaqarpugut aqqusinertigut assigisaatigullu angallannerup isumannaatsuullunilu pitsaasuusariaqartoq. Tamanna qulakkeerneqarsinnaavoq piumasaqaatit assigiingitsut atorlugit. Tamannalu aamma qulakkeerneqartut taaneqarsinnaavoq ilaatigut biilit assakaasuisa quaannaveeqquteqartinneqartarnerat ukiukkut piumasaqaataasarneratigut.

Nunatsinni silap pissusaata aammalu nunap sananeqaataata angallassissuteqarnikkut sillimaniarneq eqqarsaatigalugu annertuumik atortutigut piumasaqaatitaqarfiusartut Siumumi ilisimavarput, tamannalu aamma toqqissisimanarpoq inuit ajutoornikkut annertuutigut pinnginnissat qulakkeerumallugu.

Taamaammat siunnersuut manna sillimaniarneq eqqarsaatigalugu maannamut aqqissuusaanerup attatiinnarneqarnissaa Siumumi tunngaviusumik isumaqarfigaarput, taamaattorli nassuerutigissallutigu siunnersuuteqartup paasisutissat saqqummiussugai peqqissutsimut annertuumik attuumassuteqartut annertunerusumik paasisaqarfigineqarnissat Siumumiit soqutigalutigik.

Taamaattumik tamanna qulakkeerumallugu Naalakkersuisut allannguutissat siunnersuutaat ilalerparput, taamaasilluni angallannermi isumannaallisaanermut sunniuteqanngitsumik aqqusinernik nungullartitsisarnermik silaannarmillu mingutsitsinermik annikillitsinissamut periarfissanik misissuisoqarnissaa oqartussaasuniit qulakkeerneqarsinnaanera Siumumiit isumaqatigalutigu.

Taamatut oqaaseqarluta siunnersuut manna Inatsisinut ataatsimiititaliami suliareqqinneqarnissaa inassutigaarput.

Anders Olsen, Siumut.